

新續高僧傳四集

嚴修署



未

249

5600

1898
6203



8048

續高僧傳四集卷第六十二

衡陽喻謙昧庵氏編輯



雜識篇第十之三 正傳十五人 附見十九人

明海鹽福臻寺沙門釋梵琦傳 梅雪

虎邱雲巘寺沙門釋至仁傳 心覺 德珉

福州鼓山湧泉寺沙門釋宗繁傳 善緣

泉州開元東塔院沙門釋正派傳 無斷

燕京萬福寺沙門釋淨倫傳 覺明 覺義 波羅

荊州普仰寺沙門釋滿秀傳 正海 死心

雲南昆明寺沙門釋廣慧傳 天祥

杭州雲居聖水寺沙門釋照兼傳

清蔭
寂章

荊州天皇寺沙門釋寒灰傳

常鎮
碧空

永嘉西岑紫芝峯沙門釋性靜傳

福州鼓山湧泉寺沙門釋智闇傳

金陵棲賢庵沙門釋性潔傳

雲南石寶山寶巖寺沙門釋思明傳

大錯
警秀

杭州雲居聖水寺沙門釋德璩傳

德一
德言

福州雪峯寺沙門釋超弘傳

明海鹽福臻寺沙門釋梵琦傳

梅雪

釋梵琦字楚石小字曇耀象山人嘗閱楞嚴至緣見因明暗成無見恍然有悟元叟端倡道雙徑琦往問之言發非聲色前不物其意如何叟就以詰之琦擬答叟叱之使出自是胸疑如填巨石會元英宗詔粉黃金爲泥書大藏經以琦善書選至闕下一夕聞樓鼓動汗如雨下拊几笑曰徑山鼻孔今日入吾手矣因成偈有捨得紅鑪一點雪卻是黃河六月冰之句旋入雙徑叟見其氣宇充然謂曰西來密意喜子得之矣元泰定中出主海鹽之福臺尋遷永祚明洪武初詔名浮屠於蔣山建廣薦會琦首應詔躋席說法圓音高唱萬籟俱清帝心悅懌賜宴文樓

親承顧問既還出帑金以賜之館於天界寺忽謂噩夢堂曰吾將去也曰子欲何之曰西方爾因訊之曰西方有佛東方無佛邪琦厲聲一喝泊然而化茶毘齒牙舌根數珠咸不壞舍利黏綴遺骨纍纍如珠所著有楚石語錄及和永明山居詩并見寺志又梅雪亦閱楞嚴次見一毫端現寶王刹有疑後至江陰觀乾明寺佛閣壯麗頓釋疑情淨慈休休翁證之其所著亦有和永明詩寄幻集

明虎邱靈巖寺沙門釋至仁傳

心覺
德珉

釋至仁字行中姓吳氏番陽人晚號澹居子又號熙怡子父仲華江州廣文仁五歲其親使拜報恩寺真純牧公七歲得度西

土控空上人赴英宗召便道憇報恩見而歎曰再世人天師也令參厚叟於雙徑叟喜謂曰仁書記虎而翼者也出世蘄之德章越之雲頂崇報吳之萬壽明洪武三年來往虎邱之雲巖道涵德隆四衆雲集旁通外經尤邃於易發爲詞章嚴簡而有法務在匡宗不以此自多嘗撰黃州蘇文忠祠堂記虞道園稱其文言謹奧有西漢風張潞公寄以詩曰今代能仁叟高風播海涯宋文憲亦曰虎邱尊者名浮屠見性炯若摩尼珠被召至京以佛旨爲書而對太祖大喜洪武十五年三月十九日示寂壽七十四臘六十七又心覺源住虎邱名德推重郡人易恒詩有白雲尋老衲有約不須招之句又姚少師廣孝詩所謂聞道蟾

公似贊公一瓶一鉢寄山中者是也與高啓徐賁爲詩友德珉
字伯貞號在牕嘉興人洪熙間住虎邱工詩

明福州鼓山湧泉寺沙門釋宗繁傳 善緣

釋宗繁字獨芳姓陳氏閩人也年十六從鼓山光嚴得度出嶺
參天界寺芳林明洪武壬戌舉住舒州浮山己巳閩郡僧綱舉
送教府考選中程主席當山繁富於文學尤擅詩名與郡人唐
震王褒周元王侑爲友多所唱和有詩集行世寂於壬午葬祖
塔善緣字了心侯官姚氏子七歲依城東寶峯庵無塵出家參
鼓山藍田後住南京靈谷寺禮僧錄闡教幻居大師永樂三年
鼓山虛席領檄主之建千佛閣五年春詔設廣薦大會於蔣山

徵天下名僧善緣應詔入京說法稱旨恩賚甚渥賜號成就秋
歸舉任都綱後寺燬於火善緣重興殿閣及諸寮舍宣德庚戌
還珠閣壞更爲募建明年落成十月示微疾十九日沐浴更衣
口述生平行業命侍僧書之所積金穀悉委其徒命剏大殿三
門語終而寂塔於獅峯著有靈源集蓋取鼓山前代老宿事實
編爲叙傳及名人文藝爲山志之權輿後黃用中徐興公相繼
纂輯卽本於善緣

明泉州開元東塔院沙門釋正派傳 無斷

釋正派字覺非姓蔡氏晉江人也生有夙慧苦志勤學出家後
居東塔院博洽諸經兼以文藝助我禪悅時有無斷老宿棲止

新編高僧傳四集
寺中淹通內外典籍素見重於王遵嚴諸文學正派承其啓迪
別有會心無斷深契之一時名籍甚郡司寇詹咫亭以直言歸
結室北山巢雲延正派居之禮意殷殷山中唱和有竹下烹茶
雲入袖松間倚杖鶴窺人之句後遊吳越名藍勝境咸有題詠
人多傳誦咫亭復邀朋輩及諸名德結楞嚴社每會人立一義
多方參辨唯正每奪其標有云慙愧未能成底事逡巡難得似
前人可見派之素履不以文害志也臨終示偈曰勿毀勿讚本
無涯岸雲度長空月浮碧漢世壽七十九

明燕京萬福寺沙門釋淨倫傳

覺明 覺義
波羅

釋淨倫字大巍姓康氏昆明人也幼性敏慧卓越不凡明正統

庚申禮大華無極泰出家受禪學戊辰謁大方天順癸未參古
庭於浮山一日問答間偶呈偈曰叢林處處播春風此日尋師
到別峯末後聲前句非句寫在山河大地中庭喜遂入室授法
爲臨濟二十四世薄團深穩極盡玄妙成化乙酉卓錫都城創
萬福禪林宗風鬱懋緇白來者無虛日癸卯登五臺弘治庚戌
復遊五臺壬子歸竹室閉戶讀藏薰室自脩所著有竹室集多
宗門語同學有覺明覺義者明字絕機李氏子義字徹堂倪氏
子皆滇城人也俱爲無邊海弟子偕參古庭一日相與言笑忽
焉語歇並坐化去乃共爲一穴造塔其上額曰雙月淨倫爲詩
紀之曰塔目何緣題作雙月名道人高行信湛評虛懷比比冰

新編高僧傳四集
霜清小朗大朗爲弟兄三十青黃節不更只觀百歲如長庚日
嘗一鉢和羅羹庵前孰趁春風畊有時對月陶幽情有時坐石
談無生此身不啻一點晴雲輕身外何時能營營虛空無縫藏
枯形卻把雲根苦鑿成巖壑含虛兩鏡明海天瀉影雙珠擊碧
雞午夜空山鳴溪頭眠雪泥牛驚冑似南陽一片語頭行千古
萬古遺嘉聲又波羅禪師姓趙氏大理人初居蒼山嘗登懸崖
西向禮佛洞明經地後謁諸方印心於古庭歸而禮佛如故一
日經行巖上屹然立化七日不踣鄉人香燭禱之輕如一葉遂
就茶毘得堅固子七瘞於浮圖後人名其壁曰波羅巖山勢巖
嶮登者凜然風吹草木皆作禮佛聲所立之石足紋宛然塔於

蕩山院字猶存

明荊州普仰寺沙門釋滿秀傳

正海
死心

釋滿秀字天柱自號倉谷老人初依北宗出家傳大通下二十
八世後參伏牛發明心要龍池老人以衣授之於時有兩宗並
立之目以秀北宗人南宗法也及主荊南普仰寺暢厥宗風復
區南北有禪者正誨自宜都來與語契之煅鍊三載卽付以北
宗正誨別有傳其南宗法派則傳之正海云以明隆慶戊辰說
法示寂門人取舍利建塔奉之有倉谷集若干卷行世後有死
心者黃岡諸生袁文煒也削髮京師崇國寺公安袁宏道兄弟
偕之作吳越遊已而歸楚愛大別山水卓錫藏經閣明萬曆時

止龍灣之南聖壽寺宏道有贈死心詩具別集時遼陽用兵死
心感而賦詩云烽火城邊百將營百家鈴鐸萬家聲中原子弟
花千朵絕塞將軍草一莖膏血總輸還列陣文章無補漫談兵
只今海內干戈起未必禪房夜夜清死心頗好吟詠惜多散佚

明雲昆明寺沙門釋廣慧傳

天祥

釋廣慧字野愚嵩明人幼習詩書才情開敏既通文理尤契玄
機後得法於水月禪師便事遊參行腳江南數十載始歸滇胸
懷廓落居無定所而學藝日進雅望益崇著有頌古百則漚花
集諸編其他題詠頗富有雞足山觀風一絕云遊徧蒼崖盡法
身誰云門內更藏真相逢欲問拈花事千古空傳獻笑人聚洲

王太史以師禮事之後於昆明示寂閣維獲舍利手骨赤如珊
瑚辭世偈云一句原無踏倒太初非凡非聖萬象如如後有天
祥者不知何許人居大理城中通志載其詩有聞角一絕云十
年遊子在天涯半夜秋風又憶家恨殺葉榆城上角曉來吹入
小梅花又題龍關水樓云此樓登眺好終日俯平湖葉盡村村
樹花殘岸岸蘆漁翁晴獨釣沙鳥晚相呼何處微鐘動雲藏島
寺孤有禪外意

明杭州雲居聖水寺沙門釋照兼傳

清蔭
寂章

釋照兼字守泉姓陳氏海鹽人幼而機警性復慷慨以利濟爲
心九歲出家爲小沙彌從塾師受四子書讀孟子至盡心章恍

然曰心藏佛者也性即佛也見性則見佛見佛則無佛而後可以證道乃屏雜家專究釋典又念人生斯世須有功德及物慈航普濟願力深廣未克一時了償因欲量力拯救隨緣施捨拔去疾苦則事易舉於是禪習之餘更習醫方詳繹內經靈素洞曉脈理活人不可勝計嘉靖中運分宜用事瘡痍遍世忠良莫保照慨然欲如京師面短之同侶咸謂非僧家所宜乃止然每中夜趺坐北向長吁不置云嘗闢外麓山房延接名流更設藥局以宏胞與與人談論洋洋灑灑終日無倦容見有疾則愀然爲之不樂若大病之臨身也茶毗後瘞安樂山塔弟子清蔭字宏泉嘉興蔡氏子少聰敏薙髮外麓襲照業以醫鳴於時而修

持益力因往平審聞谷大師所受具足戒歸請徑山義航法師說楞嚴般若諸經有楚才者重建圓通閣未畢而歿蔭爲勉力成之復倡修大雄殿木商倪作霖曾受病幾瀕於危爲蔭所全活因施三百金購大木以畢其願及蔭寂塔於西山月桂峰下後數十年開拓禪房猶用其遺材不盡云又寂章字密印桐鄉毛氏子自幼披剃受具足於靈隱具德禪師以醫能救濟衆生遂紹宏泉之業且謂人曰不能作人天師何弗精岐黃術可想見其爲人

明荊州天皇寺沙門釋寒灰傳

常鎮碧空

釋寒灰不知何許人善誦梵唄杭聲高引字句清圓響入重霄

令人聞之竦然起敬萬曆間來棲天皇嘗以香水和金汁寫金剛經從朝至暮手不遑息偶近黃昏几上無鐙若有微光筆不停書便入初夜因饑思食纔一轉瞬卽呈黑暗評火視之字畫端嚴無異平日同時有常鎮字玉菴者當陽李氏子也好學不倦於孔墨莊老無所不讀一日閱佛書悟三界無安猶如火宅悚然學出世法與碧空禪師水乳交融乃說髮焉鎮風度端凝神采挺秀士大夫咸推重之每講摩訶止觀大智度論涅槃諸經聽者萬指嘗有偈云珠泉白日淨塔影半空沈門外長安路雲中智者心時南大理寺卿陳夕矚贈詩有詩能譚上界我亦指西方之句居寺三十五載德流緇素名播中外以萬曆九年十月十七日示寂塔於大通寺後其辭世偈云彌陀此日來山僧此日去登高一又天撒手雲深處雲深處沒毀譽吾道一貫之原來是忠恕

明永嘉西岑紫芝峯沙門釋性靜傳

釋性靜字普緣武林人也初淨髮於西湖久之弗怡攜所貯手掣茶策杖天台千丈瀑下及五泄龍湫遍試之至永嘉聞西岑紫芝峰下有鑑泉爲張又新守郡時烹茶水亟荷瓶往至則一泓冰冽出旗鎗淪鬪不在中樞惠山下迢然曰吾老是山矣遂卓庵其旁穀雨團黃競芽走大羅諸絕巘摘盈簾肩歸以意製之越宿茶成注諸甌令雪黑浮香撲案啜之一時遐邇噪紫紫

芝峯下僧茶特異凡高人墨客名縉勝羽及薦紳先生赴如奔泉靜不殊彼我操單持滌鑿注缶人人自以新遘盧玉川癖歸而吮他茶便不爾或詩渴酒醒亟詣雙杵茶煙下乞一杯如醜翻灌頂性簡率冬夏一方布袍修幹鶴臞留髭伐髮或兼旬嬾雍毳毳被兩耳晨昏無恒課而魚磬自若不輕度弟子而道侶日相問訊所居不過茅茨而盛飾一無量壽佛像窮極莊嚴客至伺陸竈水沸開雲腳浮乳花引滿別去不講道說偈而禪味醴醴直從舌根證入林殿閣任先劉方伯元受邵水部金門周雪朗陳三有兩孝廉咸與之遊皆深徹佛旨謂靜乃透悟如趙州喚喫茶者不是過也而自起鑪竈獨關心傳熱鑪熾炭煨十

指如舌錐其餽遠則署曰普緣茶得之者珍異如摩尼珠優曇花不必曹溪一花五葉而後侈盛也靜以明萬曆庚申住此山至己丑十月十有一日示寂郭仙庵茶毗葬紫芝峯下李象坤爲作茶祖禪師塔銘文詞清麗自載別集

明福州鼓山湧泉寺沙門釋智闇傳

釋智闇字雪關姓傅氏上饒人齠齡捨身徧習經論便解文義稍長讀壇經火燒海底句心大疑之往參博山山示以船子藏身語默究久之偶見槽廠拽磨忽磨鼻脫去有省作偈呈山山日子可參禪也一日指衲衣令作頌闇援筆立成五頌山曰汝偈固佳但風骨大露須知宗門語句如滿口含冰不曾道著水

新編高僧傳四集
字復曰子根太利須是死却全心始得聞再拜受教卽閉關六載中懸大鏡對之趺坐纔覺業識心動便指摘鏡中人久之收放自然作雪關歌山見之擊節稱善乃爲啟關壬申曹能始觀察請開法當山解制上堂曰九日期已滿閉門作活事不曾捏殺獼猴子重疊山關未易過大抵末法禪期眞參罕遇縱他意樹抽枝未見心花成片雖然如是冷冷豈無一粒豆燭有不跨石門扶持祖風者乎如無且向蘆花深處宿月明穿過釣魚臺未幾示寂建塔博山間亦能詩詠天鏡巖云扁秘靈竒久鴻濛忽啓藏巖吞江霧白泉灑洞門涼鏡可容天面窗惟貯月光道人何所見一鳥過滄浪惜多佚亾

明金陵棲賢庵寺沙門釋性潔傳

釋性潔字潤庵別號樂愚博野人失其姓氏童年依城西寺瑜伽師剃落習讀經論年二十隨香者步至五臺山見師子窟法席之勝乃求依止時空印喜其年少氣勁許之入堂三年之中華嚴大鈔與諸經論聽習已周究竟佛法大旨不在文字知見因棄前日所蘊敝衲一肩孤身萬里歷抵諸祖道場禪講尊旨一視無餘拂衣竟去仍歸五臺空印視之曰南方行腳一遭一領破衲也不曾換卻性潔曰師不與換誰能換得空印領之萬曆庚子隨侍空印至燕京止明因寺啟楞嚴法席踰年南行止雙徑凌霄峰下而同侶觀衡禪師方出天臺直造徑山相訪見

之大喜是時茶熟要衡入山摘茶衡曰住山人貪心亦不除多
茶何爲潔曰你也得飲衡曰我祇待人以茶飲我潔一喝衡曰
幸汝不似我般人已而衡去潔亦結社匡山栖賢寺未幾復持
鉢白門縛茅於謝公墩右雖在城市蕭然獨處瓦罐茶鐺更清
於巖穴深處眞火宅中一團冰雪有爲煩熱所逼一與相接頓
入清涼從此高人名士多就之消其俗燄卽塵肆若山林未捨
人間已超然世外矣而大司馬李公殿元劉公密契允深而印
入心源者則宗伯凌公侍御陳公已形影無間於是易茆茨以
薨棟儼然一功德林因自栖賢來亦額曰栖賢志不忘也潔居
此二十餘年煙霞城市變幻無時心目間唯匡廬在望而已以

崇禎十五年九月二十九日示寂卜塔於牛首山中啟穴則有
山之耆宿號慧明者先在其中乃二函同葬共作一塔亦如多
寶釋迦分坐一塔以示十世古今終始不離於當念十方刹海
自他不隔於毫端者也癸未釋觀衡爲之銘具顯愚集

明雲南石寶山寶巖居沙門釋思明傳

大錯
警秀

釋思明者劍川向湖村趙氏子本名啟華以諸生試高等食廩
餼將貢太學而明叵因入寶巖披薙自號思明以寄意焉往來
三迤間行腳無定晚出黔蜀不知所終所著詩曰一衲吟草已
佚獨雞山傳其題壁一律云浮杯萬里涉煙波白衲團團破似
蓑龍象箇中知己少江湖方外故人多幾年行腳誰能識一曲

陽春獨自歌到處隨緣堪挂錫無邊風景寄松蘿又有大錯者
丹徒錢邦芭也明季官雲南巡撫品節學問冠絕流輩明桂藩
稱帝建號永曆邦芭竭力翊衛爲結李定國劉文秀白文選以
阻抑孫可望其功最多帝倉卒奔緬甸相從不及乃削髮改僧
服自號大錯往來滇黔晚至衡嶽死卽塔焉雞足山志徐霞客
創稿簡略未刊大錯居山一年大有增補爲滇中山志善本所
著蕉書及詩文集皆散佚劍川趙聯元搜輯編爲遺稿四卷其
詠梅柳詩舊有傳本已刊入雲南叢書又警秀字補樵永昌人
年十一遭亂被掠至江南爲宦家子心厭浮華入南嶽福嚴寺
爲僧初師原直後從見月及主德山尋親至滇父母早世作履

霜詠而還著有湘煙集倚鳴禪師語錄

明杭州雲居聖水寺沙門釋德璩傳

德一
言

釋德璩字寶雨姓陳氏嘉禾人璩他本或作瓊而字姓籍地事
跡皆同知一人也璩方七歲隨父入杭至雲居聖水禪寺見紺
宇宏麗寶龕嚴飾道心激發如逢夙遊捨之出家欣焉樂從初
禮慕雲後參覺明十年之間兩師繼寂璩未披緇遽膺寺務勤
瘁敏達成嗟異之年二十三受戒於聞谷大師持之嶄嶄惟謹
及赴新伊古德講席數年得提示之要於是攜屐挈鉢西走豫
章訪匡氏之遺廬踞紫霄之絕巘空濛寂歷如遇眞如久之乘
風放武昌摩赤壁長江盪胸大崖聳日廓然有洗空一切之意

迴樞白門花巖彷彿南宗點滴在師單持一揮手間卽得所至境與年忘尋以歲歉還棲寺中蓋冥心參訪又幾許年復杯浮閩渤延睇武夷攬九華三谿之勝三年而遇漢冲林君鼓琴而樂之盡得其傳遂稱絕調願受教者無虛時過萬玉山房有聲從巖谷冷冷而出不知其在十指間也璩爲人伉爽能任事與人交歷久無倦容更好爲之下遇橫逆則坦然受之不與校世人以是益重之性誠慤每登壇作法必有奇應常爲延平令陸君道胤追薦亾母夜風雨滅燭有光白天照壁如日見者驚歎馮之煥父參軍楚南樸返自燕未抵家門夜半於逆旅蹴同行者夢中使起曰吾家有使召我及歸詢之方百日仗璩設薦故

也儀真守將楊新亡母迎璩資往見母冉冉駕空躡梁而來新投地哀號望璩頂禮微師吾誰與見母生天上也著有如雲集又德一字達方仁和郎氏子禪學之餘兼精詩賦一時名流樂與往還年登大耋趺坐而化有詩集一卷德言字心學精岐黃工詩能文總河陳鵬年少宰湯右曾仇兆鰲往復唱和有趺翠樓詩集一卷

明福州雪峯寺沙門釋超弘傳

釋超弘字如幻姓劉氏惠安人也父佑官潮州府學教授家世儒素生而聰邁髻齒能文手不罅慮十九爲諸生屢試冠其曹受知賞於黃相國石齋才學重於時年二十七嬰劇疾知四大

匪堅生死事大偶讀維摩詰經益信有宗門向上詣遂有絕塵之思喜從方外遊值雪峯巨往還黃檗道出惠安邂逅瞻拜便蒙激發於是矢志皈身尙羈俗緣荏苒歲月世情愈澹明季喪亂清兵入關天下改革頒令薙髮弘乃慨然辭父母捨妻子就平山寺從徹際脫白然戎馬滿郊所在糜沸久之途徑稍通乃卷襪趨漳依巨師於南山寺止於侍寮痛下鉗鎚多有省悟巨所居泉之招慶延福會城之芙蓉雪峯弘皆執侍左右殷勤十載拈頰機答無爽玄旨一日巨問簷前雨聲點點滴向何處衆所酬對俱未契弘曰否則落在師鼻孔裏巨首肯之丁酉歲隨之慶城竟授以衣拂戍戍春歸溫陵不常厥居盤桓山水間笠

杖蕭然久之出主靈應寺無香儲恒苦不給因自持鉢以資餽粥乙巳霞舒蘇家諸檀樾延居楊梅山雪峯院亦真覺禪師舊刹也與衲子數輩刀耕火種暇則爲說大義道望蔚然距雪峯二里許有慧泉古基壬子蘇君爾源剏建精藍迎弘居之從此逍遙兩寺與名流達者詩偈書疏往來酬答十有四載戊午春年已七十四矣知期將至謂其徒曰曉露春霜光陰無幾可預建一卵塔身後母爲爾累卽啓土督役復自撰銘中夏工就每言中示意不久於世至十月初始有疾衆進藥食則卻之曰世緣已盡食無益也客至則執留之曰相見無多日吾當與子訣笑言不衰二十日沐浴更衣吉祥而逝壽七十四夏三十二著

述甚富今所傳者瘦松集八卷及語錄二卷

新續高僧傳四集卷第六十三

衡陽喻謙味庵氏編輯

雜識篇第十之四

正傳十四人
附見九人

清虎邱雲巖寺沙門釋自扁傳

鼓山白雲峰湧泉寺沙門釋元賢傳 道霈

泰山普照寺沙門釋元玉傳 佛藏正

四明天童寺沙門釋本豐傳 一揆

磬山青溝禪院沙門釋智朴傳

福州雪峰寺沙門釋照拙傳

漳州南山報劬寺沙門釋超極傳

長沙嶽麓寺沙門釋續燈傳

嘉魚西安禪院沙門釋弘照傳 宏琛

燕京觀音禪寺沙門釋元徹傳

南嶽石浪庵沙門釋法智傳 異目宗

黃山雲嶺禪院沙門釋普信傳

昆明妙湛寺沙門釋讀徹傳 一雨水目

大埔南安寺沙門釋幽冥傳 成鷲

清虎邱雲巖寺沙門釋自扁傳

釋自扁字道開號闔庵姓周氏吳人出家虎邱詩如石田畫宗
巨然師事蒼雪徹汰如河通賢首慈恩二宗旨歸講圓覺於虎
邱講涅槃於華亭講楞伽於武塘妙義雲委如餅瀉水順治壬
辰六月自樵李歸虎邱東小庵屬疾數日邀蒼公坐榻前手書
訣別有曰一事無成五十二載一場懨懨雙手拓開志氣清明
字畫端好斂衣端容擲筆而逝塔在庵右其徒文圭謁虞山錢
謙益為撰塔銘

清鼓山白雲峰湧泉寺沙門釋元賢傳 道霈法文

釋元賢字永覺姓蔡氏建陽人父雲津世守詩書遠祖西山為

宋大儒賢初名德懋早歲入泮爲名諸生嗜周程張朱之學年二十五讀書山寺聞誦法華偈豁然開朗因從趙居士豫齋受楞嚴法華圓覺諸經明年壽昌無明開法董巖賢往謁之反覆詰難無明曰此事不可以意解須力參乃契歸究語頭久之無所入一日留僧夜坐舉南泉軒貓語有省乃作頌曰兩堂紛開大無端寶劍揮時膽盡寒幸有晚來趙州老毘盧頂上獨盤桓舉呈無明明謂之曰參學之士不得於一機一境上取則雖百匝千重垂手直過尙當遇人所謂身雖已在青雲上猶更將身入衆藏是參學眼也爲別頌曰大方之家手段遇物一刀兩斷趙州救得此貓未免熱瞞一上若是有路英靈畢竟要他命換

賢得頌益省年四十始棄家往建昌依壽昌寺無明落髮未幾得承心印及無明遷化依博山無異三載遂進具戒嘗舟過劍津聞同行僧唱經云一時警欬俱共彈指是二音聲徧至十方諸佛世界賢因徹悟見壽昌用處乃作偈曰金雞啄破碧琉璃萬歇千休祇自知穩臥片帆天正朗前山無復雨鳩啼癸亥秋居甌寧金仙庵閱大藏三年徙建安荷山明年之樵李請藏經歸作建州宏釋錄復會通儒釋作窺言壬申謁聞谷於寶善庵時宜興曹安祖兵憲請作諸祖道影贊乃屬賢命筆賢成百餘贊聞谷驚訝不已卽以大戒付之推主鼓山年已五十有七矣尋遷泉之開元杭之眞寂劍之寶善復歸鼓山重剎梵宇諸所

撰述並語錄凡二十種都百餘卷其目曰淨慈要語諸祖道影傳開元志禪餘內外集楞嚴義奧疏金剛略疏心經指掌四分戒本約義律學發軔鼓山志洞上古轍及續竊言補鐙錄以補五鐙會元之闕復作繼鐙錄蓋傳鐙錄止於宋自宋至明四百餘年未有修者賢廣蒐博採至是乃有成書寂於順治丁酉年十月七日壽八十臘四十有二臨化偈云末後句親分付三界內外無可尋處塔於寺之西畚其居山頗致瑞應甲戌四月十一日甘露降山門松樹賢有偈曰聖瑞端宜降大都窮山何得獨沾濡曉來扶杖三門外笑看松頭綴玉珠至九月十九日甘露復降亦偈云玉露霏霏又一番滿林花木已同繁丁寧莫道

甜如蜜恐惹遊人入石門道霈字爲霖建安丁氏子出家白雲寺參聞谷密雲愿諸講肆後得法於賢撰述甚富有語錄行世寂於康熙壬午壽八十有八又法文字淡然姓蕭氏沙人也依天寧常青披剃參圓玉得法乾隆時繼席鼓山能屬文擅詩名有詩集行世

清泰山普照寺沙門釋元玉傳

佛藏正

釋元玉字祖珍號古翁廣陵崇川得法金粟天岸居泰山普照寺聚經典數千卷澄思密探寺前一石題曰界塵石名流往訪咸比之遠公蓮社有石堂集金臺隨筆諸刻佛藏正禪師者江南望族履豐處順顧棄之若遺誓死入山終能解脫得大自在

康熙丁巳秋緇素敦請繼席古中盤初有大博禪師道隆望重
中興斯寺正從之修省得其法要奮厥孤標苦志枯守不下山
者有年戊午九月翠華臨幸入丈室取正所著語錄偈頌閱之
欣然命筆題額且賜之詩詩曰中盤遙望蓮華峯日映山林氣
色重老衲吟詩渾半偈翠輿臨發又從容是年除夕重書前詩
命御前大臣薩畢漢齎之至寺正復以偈讚之云御筆題詩第
一峯翠華初駐鸞重重盤山草木承恩澤野衲欣逢識聖容蓋
自彩筆倡酬三聚雲臻一乘雷震而祖庭道法丕宏厥緒矣

清四明天童寺沙門釋本儂傳 一 揆

釋本儂字遠菴姓陸氏崑山人也襁褓即孤依母與兄因感嫂

亡屍動懼而告母求出塵世母曰我昔見天童僧行不凡汝果
有志可往從之即依命剪髮徑投天童時明崇禎壬午六月初
七值密雲退休通玄欲往求度俄阻危疾既聞密逝山翁道忝
繼席遂從薤度前後追隨歷經八刹服勤一紀其間鉗錘鑪鞴
艱苦備嘗受付囑於崑山安禪菴清順治十二年冬就維揚寶
積院請明年四月始入院示衆僧問春風吹大野萬物盡光新
爲復法爾如然爲復神通妙用儂云脫殼烏龜飛上天僧云一
聲幽鳥雲天外靄靄山光翠欲流儂云卻被風吹別調中僧云
青帝不勞常作主迥然不逐四時凋儂云如何是不逐四時凋
底句僧禮拜儂便喝儂嘗至巴陵齋禪人統四衆就普濟庵請

小參不傳之道迴絕雕鐫松直棘曲鶴白烏玄山僧不是無玄
可說無妙可宣不欲強生節目誑惑閭閻簡直說一句究取父
母未生前機緣尋應湘陰神鼎之請始爲開法遷主天童凡十
二載移蛟川之瑞巖未幾繼席平陽山翁示寂應鄞白雲之請
尋復歸瑞巖康熙癸亥秋入寂世壽六十有一著有前後語錄
詩集數卷其被衲歌戲贈兀菴大師者詞曰千絲織萬絲綴通
身是眼百雜碎秋雲卷處波紋開荷芰幅邊柳線脆翦盡煙霞
補不全歷窮天地不知歲糞掃衣何森秀鳳毛麟腋俱落後領
頭袖底自玲瓏文彩縱橫欺綿繡非全襪眞越格千聖不傳誰
爭得珍衣不換老瞿曇護持那費迦葉力不入衆寧隨色非青

非白非黃黑挂松時上綠苔痕梳風不染紅塵跡或時蒙或時
披世事如麻總不知不特御寒還御熱任數日炙與風吹誰爲
伴誰爲鄰機鞵竹杖與蒲輪竹杖他時化龍去渠能解作彌天
雲詩境禪心道通爲一一揆禪師者後雲外而闡化神鼎者也
其掃雲外塔云慣能喝罵諸方盡謂師有超師之作殊不知日
月出而燭火息獅子吼而百獸藏雲散盡月孤圓逢人索盡遼
天價罕遇鸞膠續斷絃

清磐山青溝禪院沙門釋智朴傳

釋智朴字拙庵徐州人早歲參方嘗謁南華憇佛日峰住五老
東西二林間最後得法青龍百愚爲洞宗三十世康熙辛亥始

巖磬谷構葺青溝之中盤漸成巨刹禪餘更耽藝文詩有佳句
爲世所稱丙寅季冬聖祖駕幸青溝朴口占應制詩曰冷靜峰
頭雲水香六龍車駕幸山堂百年勝觀唯今日塊雨條風祝我
皇旣愜聖賞遂承宸翰舊無山志朴思剏之搜集遺聞傍及碑
碣都十有四卷體例嚴潔九載乃成後得王阮亭朱竹垞諸賢
爲之參訂益臻完善但朴所著書甚富曰谷響集曰電光錄曰
雲鶴集曰盤谷集曰存誠錄曰遊臺集曰辛壬蔓草其寺後人
亦稱盤谷寺沒葬寺東同治時寺已荒落薊州李江過而傷之
爲立石題曰清詩僧智朴之墓

清福州雪峯寺沙門釋照拙傳

釋照拙字道余姓方氏莆田人也父漢卿儒修甚勤母陳氏感
奇香滿室而娠崇禎癸酉重九日生兒香氣如前鄰居異之年
十二怙恃俱失從聖壽寺竹叟薤染誦習十載往福爐依時學
受具足戒竹叟旣沒仍參福爐問不是心不是佛不是物良久
領悟大旨作禮而退益加策勵會如幻移錫芙蓉邂逅之間便
承激揚有如鍼芥遂依座下久之復辭去參虛白於黃檗機鋒
酬酢證合無異及如幻應武榮雪峯之請馳書招之隨至雪峰
兢兢自守戊午重九日如幻付以衣拂使之繼席雪峰後如幻
寂爲輯其語錄序而刊之寺左六和樓改建方丈久未就拙集
檀信經營乃成以康熙甲申年四月二十四日示寂壽七十二

臘五十塔於寺右拙賦性恬澹言笑不苟住山四十餘年甘淡泊以法道自持高風峻節足爲典型著有雪峰語錄雪峰詩集二卷及毬堂草一卷

清潭州南山報敏寺沙門釋超極傳

釋超極字休耳晚號笨翁姓陳氏靖人也父於明季以卿貢進士謁選入都病沒燕山會流冠鷓張京城淪陷旅櫬未還心懷忍痛絕意世榮竟從雪峰巨薙染得法後飄笠孤征辛勤萬里遂負櫬歸得首正丘嘗慨中原板蕩陵谷遷變欲滅跡銷聲枯槁巉岳因結茅曹巖之白壑復移長泰天城山息影棲遲極殊樂之及遊興逸發閩之武夷粵中佳山水靡不登臨少時已有

詩名中歲益遁至天真爛熳不屑作猶人語每浩唱清吟知音傳播逞逞膾炙人口顧於鉗鎚之下參究精勤智珠燦發雪峯每舉古德法旨勘驗學徒極每拈頌出人意表凡厥酬對應機無爽雪峰甚器之有瞌睡虎之喻授拂表信聲譽歛起流播諸方而華亭總憲徐公孚遠同安儀部紀公許國處士洪思又以氣節文章交契獨厚晚住南山思建法幢而世事更新兵伍雜處唯樾戶躡足委順而已以康熙十五年丙辰八月示疾泱旬奄然坐化年五十四臘二十八幻如超弘爲之銘誌稱其道眼圓明文辭瑰瑋行潔冰霜情酣泉石信不誣也

清長沙嶽麓寺沙門釋續燈傳

釋續燈字彌嵩號頑叟姓鄭氏孝昌人幼從廣化頓悟薙染受具戒於華山見月體律師得法於嶽麓肺山檀遂繼其席拈槌之餘坐嘯峰麓湘水環回夕陽西下帆歸天際澤畔行吟觸物成韻翛然迥出之資非尋常所及沈吟八載詩境禪悅俱入妙品遷居南嶽中葺及清涼寺中葺居七十二峰之中昔大錯老人卜築於此其賦詠爲楚南所傳誦而續燈避亂其間每一登眺山鳴谷應偶有所得稱口而哦有南嶽山居詩三十韵自東至咸一韵一篇及中葺後草數十篇南嶽海雲詩十首昔人謂其雄奇古樸直逼少陵蓋以虛靈之質寫浩瀚之境如雲舒風卷不可端倪其嶽麓山居詩爲次南澗法雨大師韵者數十首

蒼涼幽峭清醑淡遠之意皆獨杼機軸暗逗針鋒隨所見聞俱成義諦蓋其胸中圓明湛定興會所屬自然成響今錄其五言古詩與禪旨親切者如聽鳥云春晴花欲然山晝靜如徹側耳坐茅檐細聽鳥能說鳥語夫何爲獨使我心悅所吐無煩囁喃喃照冰雪人口多雌黃愛惡恣其轍訛言亂友朋讒言陷忠烈未若杜宇心生成一片血所惜知音希空使寒光裂惜鸚鵡鳥篇云鸚鵡鳥之俊羽毛亦足奇羽毛不足羨爾乃工言辭賈客愛金寶遠販關西陞江南尙華美高價來京畿公子見之笑未惜囊中資得之不輕易銀籠懸高枝肉食恐不屑呼童打蟲兒美人畏言語計害心離披托意挽釵釧擾亂清油絲強悍罵公

新續高僧傳四集
子畜此胡爾爲背裏謂奴婢碎羽滅毛皮細詢所憾故母乃狗
其私鸚鵡竟何罪美人良足悲荒年賣兒行去年禾盡死今年
禾尙遲米價日騰貴戶市爭糠粃東南軍餉急秋賦當夏支雖
有升斗粟又爲官納之東家不可貸西家不可移入門控饑婦
躊躇欲賣兒兒去口亦去兒饑我更饑與其死共處不若生別
離將兒出門去得粟淚垂垂又雪中古意巖寺遶冰花鐘聲碎
寒玉榑火無全威凍雲驅不出面壁擬高山衲服蒙頭入誰復
乞安心夜深門外立調高格古韻遠意深使讀者灑然壬戌還
長沙觀察趙雲岑方伯薛梁翁中丞泰巖丁公皆樂爲之助重
興嶽麓有三會語錄若干卷均刊行於世世壽五十九僧臘四

十七寂於康熙庚午六月二十九日掩靈骨於舍利塔上得法
弟子文惺爲之銘

清嘉魚西安禪院沙門釋弘照傳

宏琛

釋弘照字隱嵐參博達廿餘年深有證入付以偈云幽絃別操
古佛風刻羽引商未足同賴有知音續正響人天從此得奇逢
後主嘉魚西安院上堂僧問祖意西來是若何照云山靈有意
點頑石於峯頭藥木當機開生面於剗外是以棲心丘壑晦跡
雲隈豈冀慕地從空劈腦直得通身粉碎縱使通身有口難言
通身有手無指祇得屈已從仁顧視左右曰領略是不領略是
良久乃云其或未然聽取一偈爲續心燈出一頭青林有毒累

吾儔傳來消息無多子浩浩靈源萬古流法照詩歌風雅辯論
超倫有曉園吟集行世又宏琛與照同參博達有寤達以偈印
之後主橫溪題詠甚富有聽月吟集數卷

清燕京觀音禪寺沙門釋元徹傳

釋元徹字壁山姓侯氏高涪人襁褓失怙熒熒子立年十六發
心出家依寧國蓮花禪院一枝剃度復圓戒於溧陽崇福寺石
鑑尋至報恩作苦兩載勤力參究終無省發因行脚吳越踏徧
禪叢每觸雲山煙水花發鳥啼覺非境緣性靈絕待雖不自信
爲有悟處而隨響答機頗無滯相歸省一枝夜起廊下舉頭見
月直下豁然一如身外無餘有偈云通身卽見大光明猶是迷

雲遮太清明暗兩關俱打破驢胎馬腹任縱橫時年二十有六
己亥中秋也過溧水塔下寺見永泰互相勘發亦有入處爲數
日留乃訪鐵舟金陵天隆叩自問於宜興芙蓉更於福巖謁費
隱各見機用當仁不讓隨至嘉興萬壽寺聽三宜講楞嚴經頗
新見聞多落窠臼聞太平采石鎮麓心寺大咸善誘方來誨人
不倦往依杖履視其語默時或觸機點撥生大慚愧清夜感悲
深懷悔責咸見其真誠因勉之曰衆生無邊誓願度已身未度
先度人者菩薩發心煩惱無盡誓願斷斷一切煩惱證一切菩
提法門無盡誓願學佛稱種智修假多聞佛道無上誓願成虛
空眞盡我願無窮情與無情同圓智種徹聆斯語服膺拳拳淹

忽三年隨咸退歸東山以聯芳源流付之勗其躬行實踐深蓄厚養以待時節因緣不可輕出淺露康熙丁未將往盛京道出維揚與劉居士調元遇於舟中萍水契合受其約請住古燕觀音道場六月望日入院云釋迦已過去彌勒猶未來乃顧左右曰相逢不識面著眼莫依稀著有語錄二卷有住山偈云居在深林遠市塵山中無事絕攀緣荆門鎖日無人到時看殘霞落照前栽松根深培植在山隈日見青青覆緣苔可與山門標景致四時蒼翠拂雲堆又和友人韵深山幽谷且隨緣種粟澆蔬數畝園寒暑來時渾不覺披雲坐起覆西軒

清南嶽石浪庵沙門釋法智傳

異日宗

釋法智字破門維揚人莫詳其族姓初來衡山結茅下火場庵名石浪工草書亦有詩名與樞巡彭禹峰友善或云法智初習若行沈於厨飪嘗以鐵鉗畫其門扉效懷素體歲月浸淫扉爲之破書法遂入妙品時人因號曰破門又異日宗禪師者江西人居南嶽上封寺偶夜乘月登絕頂偈云孤迴迴明歷歷料得幾人夢覺知不是山僧消眼閉清光空過夜深時禪理清澈心與景超自是大興祖席湖湘宗之得法弟子四人正庵統源庵本綸庵經裔庵興均有德聲語錄傳世

清黃山雲嶺禪院沙門釋普信傳

蒼霞際

釋普信字師古號梅嶼姓鄭氏歛人也母夢道人手法華經一

卷來遂誕信幼而善病禮雲嶺參照哲御爲師年才十齡受以
經論俱能了解哲喜其靈慧未幾進具於華山見月旣研律議
更究文藝好學深思每見騷客詞人虛懷請益人以是稱之著
有聽松閣詩四卷郡司馬安丘曹貞吉爲之序稱爲草際幽蘭
雞羣野鶴今觀其除夜詩云寂寞山居歲月遷閑敲清磬出孤
煙嬾傾竹葉歌除夜喜見梅花放隔年又草堂吟草堂在深谷
久與人世疏好鳥松間鳴間雲與之俱心安無所營戾閣留踐
書華門有時啓以待故人車嘗植山花數百株每當春晚如丹
霞赤城庵前木蓮一株花時香聞數里欲從山徑徧種梅花坐
臥寒香以娛晚歲胸懷灑落詩思高超殆罕其儔蒼霞際者亦

雲嶺僧也禪經之餘遊心書畫著有讀畫樓詩一卷中有過蘿
青庵山行不覺遠忽到白雲窠逕曲依松轉泉高上屋過花薰
人欲醉鳥學梵相和何日煙瓢挂滄松衣薜蘿又自題畫夕陽
紅葉圖山寒木落籬花白水碧沙明竹葉青曳杖不知何處去
夕陽影裏一茅亭際與普職慎爲同輯雲嶺志六卷聽松閣讀
畫樓兩集均附刊信寂於康熙辛巳三月五日

清昆明妙湛寺沙門釋讀徹傳

一雨
水月

釋讀徹字蒼雪初字見曉姓趙氏雲南呈貢人生性敏捷慧悟
天成童年隨父捨身昆明妙湛復游雞足爲寂光水月侍者講
誦之餘研窮義諦文詞泉湧辯者莫當年二十五發志行脚一

笠飄然徧覽名勝遂達吳門嗣法一雨會明季喪亂天下多故
不遑寧處徹獨晏然更啓法會欲以慈祥化彼殺機及居中峰
繼主講席道風鬱鬱聲聞南北復興支公道場海內宗之又以
禪暇與眉叟立宰牧齋梅村請公往復酬唱詩名藉甚生平著
述頗富筆蹟尤珍晚歲講楞嚴於寶華山手編未終踞坐而逝
書有遺誠十章詞曰無端講席應寶華老病人扶上小車南國
遠鐘蕭帝寺東陽古井誌公家蒼茫不盡江邊葦狼藉空餘臺
畔花一自雲光登說後獨憐沾酒送煙霞南朝帝業幾經衰碧
眼無人辨劫灰山抱玉泉荒寺在峯標金地大僧來鉞鋒一撥
山河轉棗葉重移殿閣開衣盃相仍誰繼武法筵龍象見宏才

閉門莫怪老山僧打睡從來接上乘十日庖羹咽未下千人講
席病猶登鼓將風力聲難轉散入烟霞氣不勝如是我聞知未
及奉行倍受已先膺最初方便請開經末後圓通擇性靈我自
無心聊爲說誰人有耳不能聽蘸乾海墨收佳句縮小江山入
淨瓶珍重莫教蓮社冷天涯諸子各飄零到岸乘風實快哉親
迎遺像幾還回香花夾道羣情肅旛蓋摩空宿雨開人化雙虹
天上去泉飛百道樹頭來儼然未散靈山會想望荆溪入五臺
慶喜慣啼拋止葉飲光解笑示拈花而今哭笑俱非是何啻宗
乘辯正邪試問此槌曾白否可憐雙眼果青耶刹竿倒却門前
久大厦將傾賴木叉囊蟲漉水細微事粒米同餐展盃巾雞足

傳衣猶在定鵝頭開戒徧分身鄉音莫辨難兄弟老景無多惜
主賓博取大千憑手掌陶家游戲轉雙輪多聞誤墮示兒曹作
飯蒸砂事枉勞欲漏未除習漏重愛根不斷命根牢無心淫女
能成佛叉手屠兒早放刀道眼滄桑何足問雲霄萬里一鴻毛
晝長無暑夜無蚊帷幔虛牽擲扇巾好與時人談笑語任留知
已訴辛勤難辭鍛羽投林鳥強作無心出岫雲一自金經讀破
久奈何洩漏盡東君毛端五色障開經勞久狂花淨眼停刁斗
更聲催歷歷明量煙火散熒熒交光攝入川源影網相盤回樓
閣形何物無情頭解點也須說與衆山聽又中峯喜逢白公夜
集法公方丈云久別幾於消息斷重逢猶記道途間兩山相憶

秋同老一夜剛隨雨到山故舊何人堪共語林巒有主甕投閒
亂流落葉聲兼下聽盡寒巖水抱關又法公招遊狼山登大觀
樓云海上海樓壯大觀煙波無盡此凭欄江南一水橫衣帶天
外三山落彈丸潮色不來風勢緊客心欲渡浪聲寒高明勝會
知何日回首斜陽幾度看又解制送恆生還山云滿堂瓢笠忽
天涯雲水茫茫去路賒同坐那知君是客送行飜覺我無家九
秋露冷芙蓉色一夜風吹蘆荻花最是不堪回首處夕陽江影
片帆斜又鐵橋云自墮黃塵每慨然故鄉卿相我無緣眼前見
畫思難足夢裏尋家渡鐵蓮苗庶尙潛諸葛洞儒臣不去小西
天料應難得今生見先過此橋五十年又送唐大來還滇云小

艇難禁五兩風雞山有路幾時通殷勤爲我傳鄉信結箇茅團
在雪中送元白之燕云一帶燕山色常時入夢間平生未到處
今日逢君還客路無時盡秋心不自閒塞鴻牽別思早已出江
關挂瓢云抱鄒向空坐偶然同許由一瓢還似累何物更須留
澗響懸孤影風翻入夜秋幾時從空出猶見在枝頭送朗癯入
匡山云獨向匡廬去安禪弟幾重九江黃葉寺五老白雲峯落
日眠蒼兕飛泉挂玉龍到時應爲我致意虎溪松別吳中諸子
云相看了無意臨歧還黯黯回看吳苑樹獨上秣陵船春老還
山路江昏欲雨天白鷗頗怪我聚散綠波前其所著書有法華
珠髻并同麗府木公參補華嚴海印懺儀四十二卷在藏聞所

傳詩文散佚頗多有南來堂集刊入雲南叢書中王漁洋評當
代釋子詩以蒼雪爲第一卒葬中峯牧齊爲撰塔銘

清大埔南安寺沙門釋幽明傳

成鷺

釋幽冥仁和人九歲披剃參萬如有省順治間自江西龍虎山
仙巖寺度嶺抵大埔三河壩南安寺駐錫焉康熙壬寅正月立
三河拱極門顧佛頂山欣然樂之賦詩云清風細雨送香來借
問重重寶砌開世事不能爲此量天然相遇妙高臺又云行腳
腰包意若何我知無法法無多碧山垂下言精妙今日拈將贈
彩波上佛頂山復題偈云今日移來佛頂岡疎疎空裏雨花香
摘來幾個黃梅子世上酸酣點不嘗逾年而寂預示諸徒日時

不爽取水沐浴趺坐默然又成鷲字跡刪番禺人父國驊明季
舉於鄉鼎革後隱居授徒成鷲年十三入學後爲名諸生年三
十五喪父感念無常別母學佛於鼎湖晚棲大通古寺號東樵
山人一時名卿巨公多與往還藩使王朝恩學使樊澤達給事
鄭際泰盛譽之名益顯詩文最富所著咸陟堂前後集識者謂
其筆響風雷崩山立海凡蠻煙黑雨渴虎饑蚊草木離奇劍嘯
芒飛直歸紙上浙西陳元龍謂其文發源於周易而變化於莊
騷涵互呈豁辨才無礙詩在靈運香山之間時人以爲非阿好
成鷲戒律精嚴道範高峻與貴人遊以宏鬯道妙爲本他無所
及遇人有所諮請瞑目趺坐寂然若無聞焉年八十餘卒

新續高僧傳四集卷第六十四

衡陽喻謙味庵氏編輯

雜識篇第十之五

正傳十二人
附見十七人

清當陽玉泉寺沙門釋道嚴傳

道乾
性愷
遍見
聖義
弘禮

海寧安國寺沙門釋大涵傳

房山上方山寺沙門釋常岫傳

大觀
達聞
知幻

太平白雀雨花寺沙門釋聖通傳

東悟本

南嶽曉霞峰沙門釋文惺傳

大成

潤州焦山寺沙門釋智先傳

德鏡
行載

杭州雲居聖水寺沙門釋誅湛傳

通淵
實誌
元玠

福州雪峯寺沙門釋海印傳

杭州淨慈寺沙門釋明幢傳

杭州雲林寺沙門釋義果傳 上志

棲水大善寺沙門釋篆玉傳

長沙華林寺沙門釋文楷傳 文暢

清當陽玉泉寺沙門釋道嚴傳

道乾 遍見 弘禮
性愷 聖義

釋道嚴字悅可姓趙氏當陽人也幼入玉泉妙齡秀發清康熙
間參蓮月老人久之印可並荷衣法甲申歲繼主寺席廣宣律
教講席之暇博覽羣籍幽契山水怡養性靈游興所至輒喜題
詠有堆藍紀勝詩云堆藍秀峙依羣岡草自蒨蒨花自香浩蕩
風光駒過隙一天春色興偏長又題鐵塔云瀉影飛騰出衆崗
遊人遙指玉山旁一朝雲起疑天墮卻得浮圖撐上蒼篇什雖
富佚散甚多故無專集率衆二十餘年翹翹後進成就陶成以
康熙五十年二月八日示寂偈云寄跡玉陽七十一談玄自有
波羅蜜翻身吞卻金剛圈豈待獲麟始絕筆塔於寺左青龍山

同時有道乾者字健若一名超乾亦參蓮月機契向上康熙三十六年接主玉泉慧辯瀉流往從如水雖宏提倡不廢吟哦舊傳一律云靈機本自出天然爾足南詢不計年乘興訪梅探白雪間來覓菊步青蓮昔時已結法王社今日重開秘密筵最後極譚無所示拈花唯有此心傳後循迹人世不知所終遍見字慧日者昭邱楊氏子也幼而志學具染紫紫參鑑葦惺決擇向上擔荷正法闡揚弘旨誨人不倦嘗有偈曰藍峰玉水兩幽清苔護前朝造鑊名幾度裴哀思聖化一番錘鍊勝天成元鐘墮地山魂斷宋塔千宵鶴影驚只有今宵亭上月依稀猶見古人情退老紫紫庵結印而逝又弘禮字廓曙枝江人青年落髮師

玉泉道隆圓具後往參蓮月老人數載精求發明心地康熙癸丑主上方法席增置水田以供香積建講經臺修東禪堂善論說喜吟哦曾題朝曦閣云巉岩一片草萋萋古閣斜陽石徑迷十載憑臨惟此跡青山一路鳥空啼寂於雍正五年三月二日塔地藏院後又性愷字天茨江陵徐氏子牛角剝落從師誦讀穎悟邁衆長通經史兼善草隸蓮月弘法天皇往造焉機契日深直臻堂奧自是定慧雙圓詩歌自得與許瑤圃時相唱和其次韻有僧非巢父偏鄰許世無陳蕃嬾姓徐之句有聲士林康熙丁亥主玉泉嘗贈聖義上座詩云藕葉衣同老松花食自甘水惟思噴玉山祇愛堆藍牧笛昭邱北漁歌教塚南尋常無限

意歲晚自難堪有遺語文集行世聖義名興宣出當陽涪溪雷氏三歲爲道嚴弟子復受記荊續燄玉泉講座高談議論風生嘗說摩訶止觀法音一展聽者萬指雍正六年主清溪上堂云浪跡天涯數十秋枕流漱石懶垂釣此番若得金鱗至不枉衝波冒險遊乾隆初退歸玉泉稱三寶而寂塔於青龍山承道嚴派文字亦近之

清海寧安國寺沙門釋大涵傳

釋大涵字雁黃姓潘氏吳江人也九歲出家習誦梵典聰穎過人能通大義既長入靈巖從師繼起游南嶽禪理文心俱極超妙有名於時俗僧忌之謀折其足乃夜遁走大雪中饑則搏雪

食之自號齧雪子後住雁蕩山又入黃山因字雁黃其在黃山聞伐木聲丁丁靜中有悟盜擊之不死後居海寧安國寺陳中丞元龍撫粵西招之游羅浮歸至肇慶鼎湖山示微疾說偈而化塔在桂林棲霞寺傍著有黃山草西湖草補陀南參集彈指集桂羅壯游集鹽官剩草皆已刻陳元龍爲之塔誌見於別乘

清房山上方山寺沙門釋常岫傳

大觀知幻
達聞

釋常岫字蒼林一號松阿姓巴氏黃巖人少習經史頗能屬文嘗爲人手書尺素詞足達意遂交譽之因讀內典契心空門歸依印空長老爲之剃度千佛寺從大演義公習梵教年二十於廣濟受玉光大師規律畢卽參游五臺南海諸名勝已而棲隱

上方五載忽焉南旋結小廬於越溪遂寂其間著有松阿集弟子迎其骨塔於六聘北隅乾隆丁巳四月傳變爲之銘文詞修絮詳具山志又大觀道目者閩南人值海氛不淨舊林難問倦飛莫還偶來上方林谷蒼秀不覺神悟遂構一茅名歸一庵相將入室內侍以觀音殿主席見招至則重建堂宇修治道橋叢院規制略備丁未冬復由上方歸隱棲賢興建梅山勤勞八載丙寅秋托鉢北來自浙及燕重履雲洞山靈投合若不忍捨賦還山詩十首用記始末依然出山看雲南下弟子知幻字筠客嘉興仲氏子也幼習儒學長厭世累拜新城鎮能仁寺淡月上人薙髮依道目圓具隨入參堂精誠穎悟神契於道康熙丁卯

道目見其純篤知爲法器付以上方觀音主席旣而入山應物獨標清風歲寒挺特偶遇詩客亦唱亦和但不落恒谿嘗有偈云懶經營疏榮辱深知世事有定數名利眼前花伎倆水上浮食充飢衣遮寒無得無失樂餘年清風明月不相關至道無難罔費草鞋錢直須澗飲林棲絕掛攀撥轉瞳神祖翁鼻孔總撩天居山三十五載以康熙辛丑七月十日示寂塔於紫萬峰下又達聞字自如者六齡入山從師講授漸了文義及長更耐辛勞獨處約苦居山五十餘年朝夕孜孜日課有恒嘗以上方自東漢以來千七百餘年未聞有志引爲遺憾乾隆辛未淹關假死軒搨管直書於平日所集斷碑殘碣名勝人物建置物產詩

文風景一一詳之成山志四卷壬申而稿成江寧吳仁敵爲序而刊之

清太平白雀雨花寺沙門釋聖通傳

東悟本

釋聖通字貫一晚號拙存姓王氏常熟人生有靈光少懷逸志長就外傳略加指授即便成誦因病廢業遂專心學佛往依城中長壽庵履貞薙染素風老人爲寺尊宿喜其穎異詩法書畫皆所教導年十九圓戒於三峰川回以法器目之復思參叩發明大事首謁虎邱洞明尊者授無夢無想語如雲開見日獲觀舊物雖力究苦研脇不沾席負簞兩載徧訪諸方殊少所契會川倡道維揚上方趨往依止深相印合川再主三峰倚畀甚重

付以大法及川遷化即命繼席乾隆時翠華南幸駐蹕雲林感荷聖恩重光祖德因建大殿築山門以承先志輝煥林際先是白雀寺火曾就燼餘更事鼎瓶及東城方塔燬又應衆請力完勝果并主智林次第修舉勞不知疲年且七十矣慮諸弟子將以新春爲壽癸未殘臘避居郡之北禪寺甲申正月九日偶示微疾奄然順化壽七十臘五十有一塔於白雀聖通夙具慧心深明誼諦因人說法成就衆多而文詞微妙闡發菩提信口吟詠亦得玄旨其事素風老人尤謹辛未迎就白雀寺孝養有加病時親調藥餌殷勤累月略無倦容及其滅也喪葬如法復爲校刻息影齋詩鈔行世聖通於法語外亦有著述但存錄頗少

今所見者有自題畫牡丹詩云紛紛紅紫鬪春風國色天香一
瞬空何似毫端呈色相一枝影見墨痕中又謝顧鈍伯山以蘭
卷見貽點染幽芳巧逼真恍從九畹吐花新淋漓墨幻山中意
濃澹香舍硯北春縱筆橫施皆有法間塗漫灑亦通神安排
几供清玩看取烟生湘水濱隨流本者字東悟姓陳氏吳人也
父曰久康母虞山高氏嘗禱於神乞子而生二女神示兆曰此
子足傳宗矣本生而聰穎幼好讀書性至孝母篤信佛故本矢
志不字託迹空門絜養蒸蒸久而彌敬得法於維摩山爲費隱
禪師四世法裔嘗禮峩眉游補陀歷九華朝五臺四至京師所
止之處如摩尼圓照令人欽慕于石梅闢智林法苑立淨業於

塵埃之表晚復卓錫燕都齊化郭外靈官庵蒲團靜攝間爲吟
詠以寫性眞或繪佛像山水花卉藉資禪悅而瀟灑活潑之致
時流露於楮墨著有語錄南帙九卷及鑒雲留跡諸集都十餘
卷其自題荊州寓庵求畫西湖云移將江浙置荊州咫尺西湖
任所遊神入妙時天地闊意融通處水山優雲烟每歛開林道
霞彩頻興擁殿樓一帶芳隄春正好三潭印月又堪秋又題智
林莊嚴閣圖融融麗日洞天幽一種清華近寶樓香篆去從朝
彩接白雲來自曉風收泉流竹葉將成筏霞覆桐枝欲化蚪瑞
氣滿峰花滿麓直教斗室作神州乾隆庚午輔國公如嵩乾庵
爲作鑒雲錄銘

清南嶽曉霞峰沙門釋文惺傳 大成

釋文惺字阿諾姓周氏湘潭人也祝髮清涼寺初不曉文字一日豁然兼解文藝法語皆得正詮開席南嶽曉霞峰因號曉霞著南嶽遊仙記後爲嶽麗繼席日與其徒研窮第一義諦箋妙法蓮華經間嘗弄翰賦詩句琢字削不工不止有嶽麓雜詠曉霞詩集並阿諾語錄三卷其救蛾詩云入夜風雨狂竹窗吹破紙銀缸影亂搖飛蛾拂燈藥趁去復飛來焦頭不畏死吾見恐爾燎爾撲胡爲喜滅燄息徜徉免爾墮油裏又捕瓜螢居山樂清貧種瓜趁時節瓜瓣藤未抽螢火先食葉天胡降爾殃羣聚類蝨蠶朝食葉萎焦暮食根莖折爾腹亦靈明爾心何毒烈珠

露僅可餐林花亦可齧胡獨害瓜苗頓令瓜種絕吾輩望秋成助長意不輟護生固吾事相視忍驅滅掘地愧先賢遠離無秘訣佛旨禪心詞意悱然又出山云路下藤蘿不可攀諸峯回首白雲間扶筇極目湘江水一帶長虹走亂山亦饒有致又釋大成者字竺庵醴陵人少披剃於南嶽後行腳四方居天目山最久及老欲歸故山清順治丁酉移錫南嶽毘廬洞廣濟寺著有會聖堂集

清潤州焦山寺沙門釋智先傳 德鏡行載

釋智先字古樵原名興上姓張氏儀徵人年十一投焦山元孚出家參問石乘無得一日登山失足傾仆遂翻然有省博綜內

典兼善文翰住焦巖四十年從事興復始終不倦鳩工庀材百廢具舉四方之衆至者如歸嘗寫大士像刻石自爲之贊纂山志未削橐而卒弟子德鏡字鑑堂姓劉氏山陽人智先創藏閣功未竟德鏡嗣之以繼述爲己任悉臻完善其徒行載字碩庵姓段氏泰州人與江都謝家樹山陰潘寧同輯焦山志就智先初藁而續成之載幼時出家於清淨庵有橋在庵東半里載常至橋下取柴十數年未嘗過橋其天性好靜如此

清杭州雲居聖水寺沙門釋詠湛傳

通淵 元玠 實懿

釋詠湛字休復究心禪理博綜典籍率弟子明倫算輯寺志蓋寺自唐咸通中玉田道膺禪師由涿州至江西雲居山旣而至

杭結茅於斯而不忘雲名仍以名庵至明以聖水寺并入乃稱寺詠湛草創寺志未臻完善而寂後有通淵字崙山海昌人復掇拾舊聞雍正己酉仁和邑令荆門胡公罷官居寺甄綜薈萃遂成完帙實懿師事通淵髫年讀書寺中一病幾危通淵醫之而瘳遂不還家諷唄齋薰兼精歧黃顧以寺志數百年失修開闢有自顛末無稽恐山靈騰誚梅魂獻嘲旣辭都綱自徹緣障肆力搜討追蹤清芬凡建置人物靈異詩文有可傳誦者都爲六卷復刊中峰梅花百詠二卷及實懿水明山樓集四卷其和楊知誨趺翠山樓避暑詩云高處塵襟謝恬吟不自休門臨山路近榻傍竹窗幽雨氣迷江樹秋聲入寺樓晚涼應可納欵坐

且遲留又元玠字玉山有愁囊集一卷行世

清福州雪峯寺沙門釋海印傳

釋海印字端章號葆光姓張氏德人也父性純母氏陳生甫一周卽失所恃育於外祖母家年十七喪父乃有空門之志丁丑就開元雲齊閣出家禮道岸爲師已卯受戒於鼓山爲公自是奮勵參究凡宗門碩德莫不願入其門未幾叩雪峯道余機譚心契最垂珍賞甲申道余示疾召印至山屬以衣拂遂繼厥席是時道余方寂院宇零落景物淒清印堅忍艱苦賴以不墮嘗參無夢無想主人在何處一句久無所入一夕經行次聞風撼林樹聲覺心身慶快口占偈云一夜金風飄嶺上蕭蕭木葉盡

凋殘徹悟未生真面目不將藥汞認金丹前日疑情一時渙釋甲寅丁巳之間三居法座行證昭孚晚歲殫精著述撰心鏡合明四卷融會易理發明教典爲引儒入釋之徑時年已八十矣預知時至自作塔銘語錄有雲閣法語及戴雲法語詩則有愧軒草

清杭州淨慈寺沙門釋明幢傳

釋明幢字果樹蕪湖人也而忘其姓氏幼從雍染康熙季年始遊京邑參禮五臺還至燕山略事棲息譚言玄妙詞意藹然名動公卿雍正六年以莊親王教居德勝庵十年於武英殿行走奉旨閱視藏經十二年正月又以莊親王手教命住法源寺四



新續高僧傳四集
月八日皇戒壇畢引見命留內庭十月世宗恩賜紫衣四襲并特賜永明禪師像三幀及鑪硯如意鉢杖紅磁盤語錄法書緞袍四時法服十二月奉恩命出住浙江淨慈寺十三年二月十日永覺禪師南下幢隨之行時杭州織造長白隆公奉旨送幢入院至則重飭寺規親釐百務幾復舊觀而六時宏唱益暢宗風江南鐘版之盛道俗參學之衆自此始也

清杭州雲林寺沙門釋義果傳

上志

釋義果字巨濤姓章氏丹徒人年十一父母命出家於焦山及長雍染操行清苦自名薶草行人陳太守滄州甚器重之受具於燕京西山潭柘寺德彰後至杭侍雲林諦暉執勤九載略無

倦容命參不是話久之入堂便問不是心不是佛不是物是何語未竟暉迎擊一篋因有省卽呈偈云一擊敲開海底天塵塵刹刹盡歸源當場拈出無私句鐵馬嘶風躍九淵暉領之旋受付屬雍正時繼席雲林未幾入長安於法門多所保護乾隆戊午復主院事道望益崇汪光祿感其精懇捨貲建築廢墜一新寂於乾隆二十三年六月壽六十四有語錄及薶艸行人詩集沈廷瑞爲之序又聞竹上志者秀水人亦得衣鉢於諦暉主禾中天寧二載尋接雲林席雍正十年秋饑寺僧絕糧志爲衆持鉢朝夕市廛卒賴以濟而心身俱瘁示疾徂化年六十五臘四十九有忍菴贖語果亦留心文學增修雲林寺志八卷錢塘舉

人厲鴉爲之纂集焉

清棲水大善寺沙門釋篆玉傳

釋篆玉字讓山號嶺雲姓萬氏仁和人也年十七投淨慈寺薙染受戒昭慶嗣雷巖傳臨濟第三十五世正宗貫通義疏精研戒律清雍正十二年遊京師和碩莊親王招住海淀法界觀心佛堂十三年四月侍郎海望帶領引見奉旨偕永覺超盛考察智覺法派時已加封妙圓正修之號帝心儀之也還住萬峰禪誦之餘游情翰墨雅善鼓琴工行草書時復吟句生峭自喜夫佛本行經言太子方入學卽問師六十四種梵書大樹王子彈琴對佛香風萎花爲首楞嚴絕妙好詞天親無著以造論之才

一轉而爲寒拾青蘿吠犬東坡追步不及張無盡以居士反附契嵩以傳詩有別才豈非性海中光明藏哉萬峰地連宗鏡面對雷峯旋螺而入拾級而躋浮嵐暖翠近挹几筵玉與詩壇老宿遠瞻頰眺別構數楹結社其中烹葵燒筍薦伊蒲之饌施龍天之食清唵抱鄰韻播藝林雖片席地與五山十刹莊嚴樓閣相聳峙則詩禪兩絕也乾隆十六年德清令李芳榕延住棲水大善寺當六飛初幸江浙大府遴高僧十人迎鑾以備顧問玉在其列及回鑾馭送至碧天橋垂問諳諳卽遣內臣賜銀錠十亦異數也寺故貧瘠損衣縮食爲僧衆粥飯猶恐不繼然居寺十載不萌退志二十五年桐鄉令陳虞盛請住秀溪之龍翔亦

猶大善也然樂其間靜若將終焉乾隆三十二年重九日作偈
曰來無一物去無一物快恬七九逍遙自得遂爾入滅壽六十
三臘四十六所著南屏續志一卷詩十卷葬南屏杭世駿爲之
銘

清長沙華林寺沙門釋文楷傳

文暢

釋文楷字志甫亦號不二志衡山人初出家時依南嶽清涼阿
諾惺而胸臆灑落趨向高遠固已器之矣惺於禪暇究心詩文
不異老儒楷隨侍三十餘年時有啟誨更苦志探求遂盡傳其
學復事遊參遍歷江淮吳越使勝地風景叢林雅範皆以奚囊
貯之今詩集有過高旻招隱江天寺諸作可想見矣乾隆甲戌

夏歸自金陵靜居白雲與同參文暢聽松觀瀑徜徉塵外偶爾
揮翰吟嘯終以守巖穴爲念乾隆三十一年丙戌秋爲緣六法
長延繼華林勝地八景殊少題留楷幽棲數稔禪居多暇作八
絕以紀之獨尊峰云突兀勢參天巖幽林亦窅快登此獨尊四
顧羣山小裴休橋云橋古號裴休度來非略約四時澗水清照
徹行人腳望日臺云臺石矗幽岑朝曦遙入望扶桑忽吐紅滾
滾金毬漾片雲石云怪石列岡陵宛如雲一片奇根本自殊終
不因風轉伏虎巖云峭壁一巉崖二虎曾自伏猶遺哮吼音訪
道人難復仰天湖云溢湖勢儼然山頂自開掘祇可宕心胸范
蠡舟難越呼龍潭云潭深莫亂呼只恐龍驚起大地灑甘泉誰

知龍釀水滴水巘云岩下散明珠山頭懸瀑布朝朝雜鳥語滴
滴增奇趣楷初學詩與文暢同請業於岫嶽東林簡南禪師及
庚寅夏同門將刻楷所作詩文而暢已先寂於白雲楷哭之哀
因并暢詩刊之曰合刊詩草暢字不偶亦湘人也春日懷文楷
詩已入國朝詩選其遊西林詩云伏霞盡處有青岑曲折寧辭
仄徑深崖樹疎疎行古殿廚泉悄悄界東林采薪頻入增山曉
游客希來便陸沈不是天龍曾衛護樓臺未必到於今西林有
峯名青岑昔爲禪林今易數主未能長護持也楷暢并有語錄
詩則昔人稱爲聲律正宗不愧唐禪亦最上乘也

新續高僧傳四集卷第六十五

衡陽喻謙昧庵氏編輯

雜識篇第十之六

正傳十一人
附見十八人

清長沙鐵佛寺沙門釋無跡傳

金陵靈谷寺沙門釋彌垠傳

彌澍

杭州雲林寺沙門釋悟森傳

見初品
高峰體
蓮月寶
純潔研
庵謙鑑

丹徒焦山定慧寺沙門釋清恒傳

覺鏡
覺詮

銅梁壽隆寺沙門釋悟賢傳

眞空
智曇

峩湄臥雲庵沙門釋源通傳

六義
德輝
涌泉

公安今古寺沙門釋如慧傳

當陽玉泉寺沙門釋隆昇傳

培潤滋
香山灤

金陵靈谷寺沙門釋禰修傳

光遠

成都昭覺寺沙門釋照常傳

四明天童寺沙門釋敬安傳

精一

清長沙鐵佛寺沙門釋無跡傳

釋無跡字寄塵又號八九山人湘潭彭氏子幼寄佛寺便從雍
度性質穎異穉年誦經即會其旨既長工書畫喜吟詠時袁簡
齋太史搜羅名流刊入詩話極一時風雅之盛獨取其淨壇風
掃地清課月為鐙之句以為得禪悅味然無跡雖好吟哦殊無
留稿今不多見初居南嶽稱衡麓山人清嘉慶時浮湘至長沙
城下棲鐵佛寺寺為唐法華尊者道場相傳為衡山王神捨鐵
造佛尊者以錫卓地得鐵數百鈞遂冶之造三佛像及大悲陀
羅尼塔故名鐵佛無跡居之因號湘濱道人後往閩粵又曰航
海道人隨地易名不拘於物嘗與人言曰予以琴韻詩詞為聲

音佛事以臨書描畫爲禪關語頭雖世間學卽超世間法也凡所游處達官文士悉欣慕之晚游吳復之閩客將軍幕府無疾而化遂葬其地清之末葉新學盛行校宇林立多假佛地寺爲學堂侵占今農校廓張寺已湮沒唯鐵佛猶存

清金陵靈谷寺沙門釋彌垠傳

彌垠

釋彌垠字福溪吳人博通經史事親以孝盧雅兩都轉深器重之延入幕中觀內典有省厭俗出家於牛首山祖堂寺得法祇園繼主靈谷三載乾隆甲辰春高宗駐蹕寺中賜無量壽經石刻娑羅樹如意寂於靈谷著有語錄詩集又彌澍字滄洪德化人生有佛緣幼而聰慧嘗遊古寺恍如舊居祝髮故里受具華

山亦參祇園嗣其法爲彌垠同門弟也初居九江龍池寺已振宗風乾隆甲寅夏繼席鍾山篤志清修不酬俗事時陳東甫方伯慕其雅度延之入署澍辭以偈云十年塵夢悟華胥曾奪驪龍領下珠自入山來皆雪意更於何處覓紅鑪好風吹入白雲關有約來朝暫出山不是在山雲懶出出山那及在山間其高尚如此主靈谷五載嘉慶己未春偶因微疾而寂年五十八著有語錄詩偈

淨杭州雲林寺沙門釋悟森傳

見初品蓮月實林鑑
品高峰體純潔研庵謙

釋悟森字道光姓陳氏華亭人雅性靜默獨喜禪坐嘗與懷清老人參論得其稱許遂受記荊歷訪名山十有餘載嘉慶二十

年復來雲林延爲首座後靜養於普賢閣終日潛處杜門不出
著有詩稿語錄若干卷道光九年九月四日書偈而逝弟子見
初字懶堂精篆刻晶玉陳勇生司馬甚契之品蓮月字藕船江
都徐氏子早歲脫白旣冠受具戒相旣圓堅持無犯研窮教典
竟入悟門嘗棲雲林止觀入神妙通畫意專工蘭竹得所南翁
之旨揚州吳貫之號稱八怪名擅一時樂與森交且精琴理所
作詩詞書法別有逸趣獲證於志安秀老人嘉慶十四年繼主
雲林三年退養於千佛閣禁足禮華嚴經時雖鼓琴弄翰而禪
理功深心多解脫譚笑而逝壽六十又六寶林鑑者嘉興人幼
通釋典負笈求師得具於玉山扣厥心要通明一切因承其法

習誦之餘學寫梅蘭親炙一泉老人久之亦工畫法頗有時名
乾隆五十五年出主勝果寺年七十始告退弟子品高峯者杭
州陳氏子旣承師資兼得筆法所謂明月梅花師若弟子者不
是過也嘉慶十年繼席勝果閱十五載以病乞退寂於道光元
年春秋五十有七又體純師名潔字粹白吳江柳氏子生質不
凡自拔塵表幼依雲林妙應閣昇達象禪師脫白後隨至京都
潔性好學內外文辭莫不精研一時名士大夫慕其風徽多與
往還互相酬唱結爲詩社已而南旋養靜靈山凡故舊出京過
訪往往辭謝欲杜門避世不爲名高唯鎮浙將軍薩宥阿請決
禪要嘗許過從潔雖偶耽幽韵自暢禪機而性心無礙枯寂空

山與放浪豪吟者非可同日語也道光六年夏示疾旬餘卽作偈曰卅年功德兩茫然想被前程業識牽今用金剛王寶劍一揮斬絕生死緣生來死去總分明老病猶能自遣情忽地一聲參已透便應一一了無生一點向人瞞不得石龜說殼事何如
可堪常寂光中樂定裏身心了幻虛萬事雲煙縈滿眼百年榮辱不關心平居自信塵緣淨久約慈航直到今靈明湛寂家中寶罔象撈空海底鍼祇上任君拈頌得圓機逗徹意何深松鬣驚風鳴萬壑梅梢得月影逾幽緣心若不離緣緣何啻虛空釘
檄頭寂年六十六又研庵名儀謙字見能桐鄉沈氏子依仁和法海禪院嵩年剃度受具於聖因寺中立尋入雲林爲記室禪

餘工寫山水可登巨然之堂德山老人付以法物嘉慶丙子推繼祖席未幾寺災自觀音閣延及行宮大殿俱爲灰燼於是誓志興修苦行叩募浙撫入奏內廷頒發帑銀萬兩而儀謙亦購大木於楚歸而重興土木道光八年落成謙仍主院事更請沈太史聽篁續脩寺志

清丹徒焦山定慧寺沙門釋清恒傳

覺 覺 銓 銓

釋清恒字巨超別號借庵姓陳氏海寧人也幼而聰秀受讀塾中風致楚楚便異群兒稍解文義探求玄理妙契禪機卽厭世味受具後得法於焦山澄洮繼席定慧誦課之餘輒肆及詩古文辭涵泳心性儀徵阮文達公元丹徒王徵君豫相與莫逆往

還酬唱時有所作多見傳詠因之士大夫皆樂與之遊然性甘澹泊雖境極清苦耐寒忍饑貧衲乞請絕口不言有借庵詩草行世塔於五州山弟子二覺鐙字秋屏覺銓字性源並承清法相繼住持兼工吟詠各有遺稿鐙尤有才能理得連山東州佚產山中香火至今賴之

清銅梁壽隆寺沙門釋悟賢傳

真空
智曇

釋悟賢字愚嶺姓周氏銅梁人也襁褓多疾寄養空門稍長因披衲城北壽隆寺資性穎悟超卓倫輩諷誦餘間兼習文翰六寅波崙皆所棲止嘗游東南歷覽名區禪機既暢吟詠益工因與同里廖先達王明誠左昌華吳乃賡合州孝廉張乃孚禹湛

巴縣龔有融諸名士結社賦詩極一時韵事著有六寅唱和集及自定詩草一卷銅梁雅秀僧中以愚嶺為清代首稱云又真空字問渠大足彭氏子為智曇五傳弟子好讀經史手不停披工書法耽吟咏喜與文人唱和著有嶼峒吟一卷智曇自楚來銅卓錫計都每以所餘造橋修路利濟行人真空師其法善叩善施樂利尤溥且至性天成篤於孝友有古德遺風

清峩涓臥雲庵沙門釋源通傳

六義
德輝

涌泉

釋源通湖南人年二十學道峨涓山絕頂臥雲庵中居恒唯一蒲團寒暑不易蓋三十餘年研闡釋典華嚴楞嚴諸經尤熟讀默識了然心目隨舉扣之卷數篇第指說無譌山中衲子多其

徒黨道風所扇歸依者衆年八十八無疾而化六義者峩眉人
居萬年寺毘盧殿即廣濬彈琴處恒誦蓮花七軸靈文朝夕不
爽臘踰七十而鶴髮松姿和藹可親人服其德涌泉居龍門院
參悟有年通五經古文善詩畫年八十一笑而逝揚廷瑞題其
所居曰一笑堂德輝者川北名家子中歲棄家居峩眉之息心
所博極梵典著有語錄若干卷及甄奧賦注釋賦爲明蜀巡撫
廖大亨作詞句多不可曉德輝爲之疏析云

清公安今古寺沙門釋如慧傳

釋如慧者姓姜氏高陽人俗稱許老蓋其字也父文章母楊氏
慧生有善根性靈獨異幼齡多疾蠲除腥味持心茹素已逾廿

載年三十始削髮從師託迹公安今古寺禮俊旃禪宿傳臨濟
正宗梵經咒語昕夕課誦爾後出世報慈寺三乘奧旨胸次灑
然力行既深道心徹悟山光悅性無非靈機潭影澄空早已參
透是以登壇說法花雨齊飛贈答揮毫烟雲並落卽事摘詞便
成韵語因人作偈話出迷津兼術精青鳥風鑑獨神喜譚靈龜
妙言微中著有金繩指迷錄一卷文人墨士多相傳寫名公巨
子尤深信仰嗣法弟子遂以付梓荆湘間猶有傳本云

清當陽玉泉寺沙門釋隆昇傳

培潤滋
香山滌

釋隆昇字雲樵姓陳氏江陵人也舊爲望族代有簪纓昇生而
穎異不昧靈根幼入玉泉歸投柱公言行超卓氣宇灑然嘗從

聊溪周先生學詩文經義靡不淹通既妙詞翰尤擅草隸一時騷人墨客多與往還道光十四年始從東山寺慧山珩受具習演經律兼悟禪觀機鋒敏妙辯論風生遂受柱公衣拂主席玉泉乙卯宏法講經啟迪來哲孳孳不卷丙辰領衆六合盈二千指清初以來未曾有也丁巳退處經樓焚修自課同治十年辛未二月三日示寂塔於河西旗鼓山著有語錄詩文若干卷皆佚而不傳弟子培潤滋者石門何氏子貌古神清言語簡重道心堅固眞實不苟同治五年受昇屬付六年主席上方聿弘戒法九年杖錫峨眉參雙桂宗乘並徹已而歸山專修淨業以約自持至葺治殿宇嚴飾神像備極尊崇光緒二十七年辛丑二

月二日沐浴更衣集衆示曰幻身六十六虛空復何有不往兜率陀徑超安樂土諸子莫悲傷吾今暫回首努力赴前節各自尋門走振起滹沱宗常作師子吼大道更何言願伸補天手寂後塔於伏牛山其徒香山仁潔者宜昌東山劉氏子也少習舉子業通經史善書翰中年忽悟無常禮玉泉曉公出家受具於荊州承天寺復得滋公衣拂主席上方光緒十年宏戒傳徒得法者衆乙酉退居涪溪日課金剛丁酉冬十月十七日示疾涅槃壽七十有二臘三十五著有文集三卷今已失傳自題壽塔云孤雁旅孤洲孤洲水常流衆鳥高飛盡唯爾獨鳴秋塔在涪溪寺前

清金陵靈谷寺沙門釋禰修傳

光蓮

釋禰修字德鐙姓袁氏金陵人披剃天印山東霞寺受具華山繼衣鉢於靈谷慈善成性悲愍感物平昔扶持忠義周恤喪引爲己事視若固然當咸豐初年洪秀全竊據金陵負隅死守官軍於朝陽門外掘長壕困之日事攻戰凡陣亡及軍營病沒者多厝寺傍禰修悉書其姓名於冊使後有所稽攷枯骸在野拾而葬之事平請於曾文正國藩重建龍神祠主寺三十餘年寇至不去舊有寺志十四卷深自護持不敢失墜光緒乙亥傳法光蓮靜修一室人罕得見寂於庚辰九月二十一日年六十六葬玉帶橋之南光蓮字利華泰州邵氏子八歲出家初事岱

岳寺僧爲師後於華山受具徧遊天臺九華南海光緒紀元五月朔禰修夜起見香鑪有光狀若蓮花五日而光蓮至寺禰修異之因授以衣拂墾荒竹重造山門及金剛殿以節省餘資未嘗募叩生平苦志清脩與物以誠無疾言厲色尤好勸人爲善光緒戊戌二月九日示寂年七十四亦葬玉帶橋南

清成都昭覺寺沙門釋照常傳

釋照常字朗西姓稅氏溫江人也父登第母杜氏夙孕靈根早通慧業質挺蓮植居近禪房年才十八界空萬千清同治壬申披薙於羅禪古寺初習梵經便窮微旨俄而太師性長與師祖寂澄相繼謝世遂主寺事新矩既崇舊規仍守增輝院宇培植

林園費無旁貸務必躬親禪修之餘兼工文藝左蘇右黃積墨
橫錦超王邁倪繪素生姿好學多材爲時稱詡光緒丁亥附近
市場更易商旅無依乃竭願力別造廣廈且築樓近水起閣傍
山沱江左右暉映霞表地靈人傑於焉聚集後依文殊院香巖
律師受具香來木樨花滿祇樹戊午主昭覺法席彌復專精擬
作雲遊徧留雪爪己未謁普賢道場膺大佛殿方丈已而辭去
躡屩南海負簦北燕歷盡塵勞庶成佛果庚申七月乘杯西蜀
駐錫東川棲止羅漢古洞竟於十月七日坐化壽六十有七川
東蘇兆奎爲之銘

清四明天童寺沙門釋敬安傳

精一

釋敬安字寄禪姓黃氏湘潭人也其先世爲山谷苗裔宋時由
江西遷茶陵明季乃徙湘潭之石潭世業農父宣杏母胡氏嘗
禱白衣大士夢蘭而生數歲時好聞仙佛事常終日喃喃若有
所吟誦七歲失母諸姊皆嫁父或他適則以安兄弟寄食鄰家
日昃不返卽號號蹤迹之里人爲之惻然年十一始就塾師授
論語未終篇父又沒零了孤苦極厥慘傷其弟以幼依族父安
獨無所得食嘗爲人牧牛輒攜書於牛背誦之一日與羣兒避
雨村中聞讀唐詩至少孤爲客早句潛然淚下塾師周雲帆駭
問其由以父沒不能讀對雲帆甚憐之曰爾爲我炊爨洒掃可
乎卽下拜雲帆喜甚每語人曰此兒耐苦讀後必有所樹立余

老不及見耳無何雲帆病沒安遂散去然猶不廢業聞里中豪
家欲覓一僮伴兒讀卽欣然往就至則使供驅役自讀輒遭訶
叱因悲歎以爲屈身爲讀書計旣違所願豈可爲區區衣食爲
人奴乎卽辭去習工藝鞭撻尤甚絕而復甦者數一日見籬間
白桃花忽爲風雨摧敗不覺失聲大哭因慨然動出塵想遂投
湘陰法華寺出家禮東林長老爲師時同治七年也冬初復詣
南嶽祝聖寺從賢楷律師受具首參恒志於岐山專司苦行諸
職暇則隨衆坐禪越五年頗有省時精一首座爲維那間以詩
自娛安諷之曰出家人不究本分上事乃學世諦文字耶因笑
曰汝髻齡精進他日成佛未可量至文字般若三昧恐今生未

能證得後省舅氏至巴陵登岳陽樓友人分韻賦詩安獨澄神
趺坐下視湖光一碧萬頃忽得洞庭波送一僧來句歸述於郭
菊蓀謂有神助且言其有宿根力勸之學授唐詩三百篇一日
成誦後精一見安所作大奇之精一名思參長沙張氏子天資
聰穎幼從塾課便解文義淡於科第而好佛書見庭中桃花因
風飄落悟世無常乃從剃度具足復還長沙置慈雲精舍於城
南迎母養之與人論說詞簡易明引導後學當機立判故於安
前激後勸卒玉其成然安自以爲讀書少用力尤苦一字未愜
如負重累至忘寢食有一詩至數年始成者念生死事切時以
禪定爲正業一日靜坐參父母未生前語冥然入定內忘身心

外遺世界坐一日如彈指頃猝聞溪聲有悟嗣後徧遊吳越凡
海市秋潮見未曾有遇嶽谷幽邃輒獻詠其中饑渴時飲泉和
柏葉下之喜以楞嚴圓覺雜莊騷以謔人目爲狂嘗冒雪登天
台華頂峰雲海盪胸振衣長嘯睡虎驚立咆哮攫前以慈心視
之虎威亦解又曾於深山遇一巨蟒御風行頭大如斗舌電尺
餘因念佛亦無怖旋養疴皋亭山中中夜聞剝啄聲甚急啓關
月明如晝四顧無人如是者數數次夕伺叩門聲急開戶見一
黑眚若圓球滾滾而去安噤羣犬逐之窮追至山腰厲聲曰擾
我何爲我豈汝怖苟有所求當爲汝度之遂號佛達旦怪尋滅
病亦尋癒其住四明最久窺天童雪竇窮攬霞嶼月湖之勝郡

中文學呂文舟徐酖仙胡魯封馬文齋沈問梅皆相與酬唱生
平好善疾惡觸境而生嘗渡曹娥江謁孝女廟叩頭流血同行
者曰奈何以比丘禮女鬼安曰汝不聞波羅提木叉孝順父母
諸佛聖人皆從孝始吾觀此女與佛身等禮拜亦何過焉甲申
八月返權長沙年三十有四行腳已閱十霜明年還石潭省先
塋宿莽縱橫不可復識望窮山慟哭村老聞之爲指其葬處始
復憶識蓋去鄉里已二十餘年積思幽潛故悲不自勝也自是
往來衡湘時有著述同縣王湘綺先生爲當代詩人見安所作
未嘗不稱善有陳伯嚴羅順循皆擅詞翰曾綜其詩十卷刻之
乞湘綺先生爲之序

